

A adapta prima di BAZV cu 1%

Mehoracion den cuidado di salud ta rekeri hopi cambio

Institucion di Inspeccion independisa y cambio di ley na caminda

CU aprobacion di e 1% extra di BAZV pa tuma over un parti mas di e “landsbijdrage” di AZV, segun mocion cu a pasa den Parlamento durante di tratamento di Presupuesto 2015, a bira un bon momento pa repasa e cambionan andando den salubridad publico general riba nos isla.

Hecho ta cu tin hopi trabao andando y diferente cambio tumando lugar pa por mantene gastonan bao control y den un cierto margen aceptabel tanten cu ta sigui ofrece cuidado di calidad y mehora e cuidado y servicionan na mes momento, segun Minister dr. Alex Schwengle a splica.

Tin puntonan crucial cu ta den proceso manera e fortificacion di un red di Praktijkondersteuners pa traha cu dokternan di cas p’asina asisti den e control y asistencia di pacientenan cu enfermedadnan cronico.

Na cuminsamento di aña 2016 clientenan lo mester nota un cambio caba den e “wachttijden” cerca dokternan di cas. Tambe ta trahando riba mehora “wachttijden” pa personanan cu mester un cita cu especialista.

Minister dr. Alex Schwengle a splica cu ta purba di atende cu tur aspecto di salubridad p’e ta mas sostenibel den e parti financiero economico y e parti di servicio y cuidado.

Un di e puntonan importante den tanto e critica di Raad van Advies, como consejo di IMF tabata cu Aruba mester haci e sistema di salubridad un tiki mas sostenibel y mas independiente, pa baha e landsbijdrage y subi otro formanan di entrada pa AZV.

Den esaki a introduci e BAZV, cu ta un impuesto cu tur hende cu haci un compra na Aruba ta contribui na dje, esta turista y hendenan local y ta bay directamente pa AZV.

E organisacion ta haciendo su trabao di controla gastonan y keda den e margen aceptabel y den esaki Minister Schwengle y Raad van Commissarissen tin un bista critico. E cuentanan anual di AZV ta riba Internet pa tur hende mira y AZV ta haciendo un tremendo trabao y ta logrando bon den su control di gastonan, pero ta un hecho cu no por corta di mas den e gastonan como cu lo afecta e crecimiento y calidad di cuidado, Minister

Schwengle a expresa.

El a bisa cu e crecimiento di 3% den gastonan ta basta ideal p’e añanan cu ta bin y claro cu t’asina cu si acaso un calamidad presenta y e gastonan di AZV ta surpasa e “afspraak” lo bay Parlamento cu e peticion pa fondonan adicional.

“Nos ta spera claro cu e ahustacionnan cu tin aworaki pa AZV ta bay ta suficiente. Tin hopi cambionan chikito cu nos lo mester haci den e ley di AZV pa haci AZV fondo mas sostenibel si. Pero na su debido momento nos lo presenta ful e plan ey na Parlamento tambe,” Minister Schwengle a agrega.

Ademas di “wachttijden”, tin diferente critica riba e accesibilidad di algun dokter di cas. Ta hopi importante pa nota cu pacientenan por entrega keho na AZV tocante puntonan asina y asina AZV por investiga e situacion y traha un raport cu ta wordo uza como base pa combersacionnan cu e dokternan en cuestion. E dokter ta ricibi un trayecto a mehoracion y si e no mehora su accesibilidad pa pacientenan e ta perde su contract cu AZV.

Minister Schwengle a añadi cu tur persona cu ta duna cuidado y tin un contract cu AZV tin cierto obligacion pa cumpli cu cierto rekisito di calidad. Accesibilidad pa pacientenan ta un di nan. AZV ta contento cu Inspeccion di Salud ta bay bin, pasobra e ta bay ta un bon “aanvulling” den e control di calidad di salubridad y asina tin mihor control tambe riba puntonan di atencion cu AZV ta confronta cune, e mandatario a bisa.

E mandatario a comenta tambe cu ta rekeri participacion di tur grupo pa cosnan cana

bon y ya ta den combersacion cu dokternan di cas y e ta kere cu lo tin mihor cooperacion di nan parti tambe. Esaki ta unda cu entre otro dokternan di cas a pidi pa asistencia, e.o., y lo ta proveyendo e “Praktijkondersteuners” pa traha cu nan. E programa piloto ta wordo amplia y e Praktijkondersteuners lo resorta bao di hospital.

Mehoracion den e situacion di “wachttijden” mester conoce un mehoracion den e prome lunanan di otro aña, e Minister a bisa.

Pa loko ta Inspeccion, tin 12 ley mas pa adapta y entrega na Parlamento, pasobra e leyman existente, esta e Landsverordening Zorginstellingen, entre otro, ta antigua of simplemente no ta completo.

Ta tuma tempo y ta rekeri presupuesto pa cuminsa cu inspeccion, pa provee e departamento cu tur instrumento necesario pa midi kico di berdad ta tumando lugar den salubridad y traha riba mehoracion.

Minister dr. Schwengle a pidi pa si tin keho, raporta esakinan p’asina AZV y Inspeccion tin e informacion necesario, por traha riba e cifra y datonan, pa por atende tur punto cu mester atencion.

